

明季節義之風以吳中爲最盛而志彌貞遇彌苦學彌醇予所尤景仰者莫如徐俟齋顧亭林兩先生亭林學行二百年來海內人士所以闡揚欣慕者至矣俟齋遺書則泯然無存所箸居易堂集雖間有傳本平生行誼士夫罕能言之澗上之祠真如之墓則頽廢之餘鞠爲茂草無復有薦馨香而申敬慕者豈非人世之至憾乎予始以戊午仲冬捃拾先生事迹之載本集及他家記錄者編年繫月爲年譜一卷並輯諸家別集中有記述先生遺事及投贈憑弔之作爲之附錄於是先生學行粗可觀覽顧先生事實後世所記務爲怪誕每致失真

卽以湯文正公訪先生於澗上一事言之當日踰垣以
避兩賢未嘗識面卓氏明遺民詩集宋中丞自訂年譜
與文正年譜所載甚明卓宋與先生同時所記必得其
實而嘯亭雜錄乃云文正訪先生久乃得見食以粗糲
文正不敢不飽至嘉道間有僞爲文正與先生書札者
極道相見之歡夫據傳聞以致記載失實此失之無心
也僞札之作則誣高賢而惑後世其罪莫可逭矣故予
爲此譜務辨別真僞以期紀實至先生身世遭遇之奇
窮飢寒之凜凜人事之舛迥骨肉之崎嶇無所不臻其
極誠如先生所自述彼蒼之所以厄之者至矣而先生

處之泰然先後數十年不挫不辱其行誼可感天地而泣鬼神蓋自生民以來遇之窮節之苦未有過於先生者也子輿氏之誦伯夷曰奮乎百世之上使百世之下聞者莫不興起墨胎氏以後惟先生當之無媿色嗚呼時至今日廉恥之道掃地盡矣安得如先生者爲之師表俾頑廉而懦立故予特撰此譜以風示當世世之覽者其亦怦然動其秉彝之好而奮其觀感之心否耶歲在己未仲春後學上虞羅振玉書於海東之西代寓居

徐俟齋先生年譜

上虞 羅 振玉 輯

明天啓二年壬戌 三月二十三日先生生於吳趨里第

先生名枋字昭法號俟齋別號秦餘山人江蘇長洲人曾祖□□字素庵太學生曾祖妣沈碩人祖銓字

雲澗處士勅贈翰林院檢討祖妣旌表貞節朱孺人

崑山朱家佐之女節孝先生集璜之姊柏廬先生用純之姑父汧字九一號勿齋

崇禎戊辰進士官至詹事府少詹兼翰林院侍讀學士諡文靖事實具明史母吳孺人先生昆弟二人先

生爲文靖伯子仲弟柯字貫時女兄弟四人皆吳孺人所生也

天啓三年癸亥 二歲

天啓四年甲子 三歲

天啓五年乙丑 四歲

天啓六年丙寅 五歲

天啓七年丁卯 六歲

崇禎元年戊辰 七歲

崇禎二年己巳 八歲

崇禎三年庚午 九歲

從虞山趙端吾先生受論語孝經端吾趙文毅公孫也

崇禎四年辛未 十歲

從葉聖野先生襄學

先生五君子哀詩憶昔執經初枋年未束髮又云揮忽十餘年

乾坤正蕩涵則受業當在崇禎初或尚在從趙端吾先生學之前姑隸於此又先生嘗從沈伯敘先生明倫學先生集中有答業師沈伯敘先生書亦不知從學在何年附識於此

崇禎五年壬申 十一歲

先生妣吳孺人卒是歲文靖公奉朱太孺人歸里第

崇禎六年癸酉 十二歲

是歲始學文文靖公開文社於家先生社作爲張天

如溥張受先采周仲馭鑣諸先生所賞一時傳誦父
執陳臥子先生子龍至折輩行與訂忘年交

崇禎七年甲戌 十三歲

先生長姊歸嘉興吳佩遠職方祖錫

崇禎八年乙亥 十四歲

入學爲弟子員文靖公攜以謁大司馬申公用懋申
公顧謂文靖曰此子非常人也

崇禎九年丙子 十五歲

從鄭士敬先生敷教受學始應鄉試是時先生泛濫
諸子百家自漢至宋說家者流無不熟覽

崇禎十年丁丑 十六歲

先生祖妣朱孺人卒文靖命先生從朱以發先生集

璜受學

崇禎十一年戊寅 十七歲

以發先生攜長子致一處士用純來與先生同塾少

於先生五歲

崇禎十二年己卯 十八歲

以發先生授經於家先生至崑山就學

崇禎十三年庚辰 十九歲

長子煜生後改名孟然先生仍從朱先生學是歲文

靖公襄校禮闈得士二十一人文靖尤賞萊陽姜垓
曰此非常人也

崇禎十四年辛巳 二十歲

仍從朱先生游

崇禎十五年壬午 二十一歲

舉於鄉時三試秋闈矣房師姜弱菴先生荃林時知

寧國縣

江右人以卓異例補房山甲申之變終隱不仕

朱以發先生贈詩有

夙昔承家學忠孝天所紀語是年文靖公休沐里第

崇禎十六年癸未 二十二歲

文靖公擬脩族譜不果是歲先生謁房師姜弱菴先

生

崇禎十七年甲申 二十三歲

三月京師陷五月南都建文靖爲權姦所搆

南疆繹史勘本

公官南都時安遠侯柳祚昌希馬阮意疏攻公言前者潞藩在京口研朝服以謁有異志自恃東林巨魁與復社諸姦張采華元誠楊廷樞顧杲等狼狽相倚陛下定鼎金陵彼公然爲討金陵檄所云中原逐鹿南國指馬是爲何語乞置研於理除廷樞杲名立行提訊其餘黨徒容臣次第糾彈疏出善類惶懼楊無補處士補亟走金陵解其獄文靖乃歸吳門

事詳先生

所撰楊無補傳

文靖攜先生入萬峯謁剖石上人命執弟子

禮歲除文靖以國變令家人不得賀歲自是先生嗣守每度歲一拜先人木主而已是年先生依吳子佩

遠於汾湖

大清順治二年

南都弘光元年

乙酉

二十四歲

五月南都破行薙髮令閏六月十二日文靖殉國

石范

夫朋舊尺牘跋勿齋太史當先帝之變已義不欲主
避迹虎邱之長蕩一泓秋水朝夕徘徊乙酉六月十

二日有剃髮之令默無一言是晚月明如晝以酒犒
諸從躬倚船舷對月獨坐突躍入水中人不及救

先生欲從死文靖不許乃號泣奉遺命殮公畢徒跣

變姓名避地吳江之蘆墟依吳子佩遠

朋舊尺牘跋
昭法匿身松

陵全髮被獲長立不跪叩亦不
答主者無如何乃髡而釋之

是年陳臥子給諫亦

避兵蘆墟時相往還先生師節孝先生佐守崑山七

月二日城陷亦自投東禪寺之後河死之

順治三年丙戌

二十五歲

文靖殉國先生舅氏吳明初先生

明初先生名待考

贈以數

金乃得藁葬先生遂廬於墓漳浦黃公道周貽書陳

公子龍招先生入閩陳公亦邀先生參其軍皆謝不

往

先生有致陳給諫及楊解元書皆言此事

是歲勒文靖公手迹於石

順治四年丁亥

二十六歲

吳子佩遠依先生於金墅

距長洲城四十里

覺浪盛禪師自

金陵來訪信宿於居易堂是年陳臥子楊維斗兩先

生先後被執俱不屈死之文靖吳趨里故第有欲佔

爲傳舍者先生作書與胡其章給諫周簫論之

此事雖無

年月可考然在喪中
故姑附記於是年

順治五年戊子 二十七歲

先生長姊吳碩人卒卽吳子佩遠配也是年先生始

與南嶽大師弘儲訂交事以師禮萬峯重建大法堂

先生爲作碑

順治六年己丑 二十八歲

順治七年庚寅 二十九歲

順治八年辛卯 三十歲

是年春文靖公墓木幾阨豪奪少司農申公紹芳及

徐禎起文學晟力禦之得無恙先生作書以謝文學

見與徐禎起書及懷舊篇注案此時文靖尚藁葬其禮葬之年不可考據先生再生記作於戊戌有云先君未曾入土又貧病說天道周星猶遲反壤先人孤櫬藁葬兩楹則戊戌尚未大葬又答友人書俟前歲營葬買山二事積逋既完竟謝筆硯此吾心也又與馮生書昔歲先公營葬有一通家賻三百金僕絕不敢沾其豪釐云云此書作於壬子則大葬在戊戌以後壬子以前以無年月可繫附記於此

順治九年壬辰三十一歲

房師姜弱菴先生書至索先生文字作書報之

順治十年癸巳三十二歲

吳子佩遠北游先生送之靈巖支硎白馬澗賦詩十章以贈姜如須行人垓卒先生作哀辭如須受知於文靖居吳五年四哭文靖之墓時人歎其風誼是

年梁溪高彙旃先生階除之側有枯蘭生白花爲作
蘭白華頌以記孝感

順治十一年甲午 三十三歲

先生外祖母王太夫人九十伯舅吳明初先生七十
爲文壽之

順治十二年乙未 三十四歲

先生自廬墓卒哭後著二十一史文彙及通鑑記事
類聚是年告成作文以告家廟

順治十三年丙申 三十五歲

作贈業師鄭士敬先生序